

朝典彙



朝典彙

漢	書	門
九	二	〇
一	〇	五
六	三	四
四	三	四
册	架	函
號	類	

漢	書
九	二
〇	五
六	三
四	三
架	冊
號	類

內閣文庫	
番號	漢 9205
冊數	64 (1)
函號	294 39

政書



竝重海內文學諸臣代有
纂述擬古作者若鄭端簡
黃恭肅其最著也第學者
欲考鏡

當代之故必以類則易見端

簡取法子長恭肅規摹左
氏獨憲章類編一書分門
彙載而惜乎其未備也余
友徐敬輿方督學山以東
試士之暇輒倣類編旁搜

博采自

高帝至

穆廟金匱石室之副往往流

布人間卽稗官野史亦備

攬擷繇開國以至市舶爲

目二百條分類萃薈而成

編名以

國朝典彙上下二百餘年燦

若指掌斯誠後學通今之

巨筏已往余宗伯世用著

國朝典故紀聞屬余更定余
既序而傳之矣顧紀聞必
國家大政大本則書非大事
則於世爲急及異聞異見
與事所從起止耳是書網

羅一代故實識大識小

朝野兼該文武之道盡是矣
漢司馬氏世職天官至太
史談作史記而馬遷因之
班孟堅受詔作漢書要亦

源
叔皮草創而女弟大家續
成之耳敬輿大父白谷先
生自孝廉時已饒著述先
工部益庵先生洎叔父魯
源太常於

朝章國典世所習聞敬輿負
良史才繇得之家學者遠
此何必減馬班世業也敬
輿精識鑒巡行齊魯所簡
拔皆名士其識趙太史季

卿於未鳴未躍之先尤稱
具眼生平自入仕至今大
叅知所至有惠績會擢河
南憲長東人擁馬首願復
借寇君臺臣疏上竟得請

此亦獲上得民之一徵也
異日建樹卽與端簡恭肅
兩公方駕奚讓乎時

萬曆辛丑孟夏之吉

賜進士出身資政大夫禮部

尚書兼翰林院學士前吏

部左右侍郎協理詹事府

事教習庶吉士

國史

玉牒副總裁直

起居注

經筵日講官北海馮琦撰



國朝典彙序

夫一代之興必有一代之
 史虞夏以來若帝典臣謨
 殷盤周誥下逮漢魏以訖
 宋元諸家紀載備矣我

同三

一

明高皇帝應天受命制作一

新

成祖丕承大統謨烈重光

列聖相傳盛德大業超軼往

代第史臣編纂守在金匱

而稗官野乘撰述多門漫

無統紀閱者苦於望洋而

余同籍徐敬輿氏世承家

學於書無所不讀而尤博

本綜

本朝典故嘗督學山東同官
有論及古今類書而大略
本朝未有集其成者公遂因
各家之成書刪繁就簡校
讐魚亥上自

開國至於慶曆分門叙事囊
括群籍一代掌故燦若日
星乃此書幾就緒而公竟
厭世去以二子與稽與參
慮此書之散失也悉心緝

閱勒爲成書共得二百卷
可謂克繼先志而有功於
史氏者矣輯成乃問序於
余余惟王元美有言國史
人恣而善蔽真然其叙章
典述文獻不可廢也而是
編不恣矣野史人臆而善
失真然徵是非削諱忌不
可廢也而是編不臆矣家
史人臆而善溢真然其續

宗法表官績不可廢也而
是編不臾矣方之漢世不
庶幾班馬乎哉

累朝典則披卷炳然匪惟稽
古者用資博識卽射策

金門者亦可爲敷奏以言之
一助矣

賜進士出身資政大夫詹事
府掌府事禮部尚書兼翰
林院學士

國史副總裁知

制誥

經筵日講官周應賓撰



國朝典彙叙

自馬史變編年為紀傳

班史因之說者曰史之

失自遷固始嗟乎此史

學之所以敝也夫史治

卷一

廣

五

亂得失之林也其褒譏
不足以示是非紀載不
足以存法鑒廢置沿革
不足以垂永久大政令
大缺遺之不昭而徒脫

略為藺聚贅為贍彼其
識眎范曄奚翅千里何
怪乎詆訾良史也石樓
先生竒瑰宏博著述甚
富以經濟才敷歷中外

稱名臣顧不能割石渠
片席懸車之暇取
國朝典故門分類別緝為
典彙一書略仿紀傳而
不失編年之次簡而核

瞻而有體一披覽而沿
革廢置法鑒是非之際
炳若日星試令腐史抽
豪班生載筆能軼此否
高皇帝神聖開天憲典昭

高垂莫不馳驟帝王凌轢
今古九夷重譯六宇晏
如

列聖相傳憲章如故而蠹
生法久竊銜委轡時或

有之

肅皇明離作兩法

祖成治即末年法尚玄默

終無敢因旒纒塞聰明

軒者

神宗久道化成政凡三變
其始也凝脂束濕而道
野揆法守中外救寧既也
懲亢厲之過稍二劑以
寬和浸假而端拱聞聲

上如封瓠下如鬪鼠弁
髦法紀遽宿官聯已開
今日之漸此先生典彙
之所繇作也陵夷至今
而益變扁鑄者漏卮矣

金鬻者煬竈矣空署轉
而充廷白駒轉而振鷺
鬪穴轉而戰野議論日
熾水火漸成憂危之士
慄二虞其所底而先生

蚤見卓識固已於

二祖

九宗之謨烈十三朝之政
令興釐二百六十餘年
之大是非大得失不厭

蔡氏
九
詳媿若預懸為今日之
法鑒者而令人一展卷
一低回也誠得先生者
潤色

兩朝實錄寧不足軼兩漢
而上之乃不敏以職在
文史濫筭校讐之役而
先生良史才願不能起
之九京干寶輩將毋重
擲揄之耶噫嘻我

蔡序
明固不乏良史才而先生
徒以經濟名則用違其
才耳雖然是編在先生
又豈徒以經濟名也
賜進士出身通議大夫詹


事府協理府事禮部右
侍郎兼翰林院侍讀學
士同修

國史知

制誥

日講官蔡毅中撰

國文



國朝典彙序

世不乏天官而鴻裁鉅製
出天官者蓋寡子長修其
先業猶云藏諸名山非有
分曹設局之務班范而下

亦各希踪腐史竭心手力
以自成一家原其具官待
進不簪事言之筆此知證
彙往初鋪揚叔近援故實
以發行菁藻煌煌乎儒紳
之卒業不可貶也往牒無

喙矣

明興二百有餘年
神聖席圖名公卿之所翊贊
躡漢唐而偕姬妣蘭臺虎

觀編摹鱗集至稱簡嚴得
體獨海鹽吾學一編其言
極雅馴而淘汰過精令讀
者肅如損飛動之趣非才
之故時勢適然今方寓習
鉛槧業帖括排偶錮腑鬲
巖廊密勿無別手口言之
不文鮮可採掇下逮碑版
傳誌禪官脞說無論四氣
不備而意爲低昂蒼黃失

實爲薦紳先生所不道卽
有如椽巨筆因無可因亦
復不能鏤雲繪水自見厥
奇史之難難於今日所從
來矣石樓大中丞生文獻
區起巍科而階臚仕營精
大業囊括

本朝典憲充實鬱勃不可以
已勒爲典彙一書起

二祖以迄

世

穆總二百 卷大都事自爲

彙彙有其條根抵枝節扶
疏溢目靡枯靡澤質有其
文危坐展披洞見我

明休美躍然神志爲聳有過
海鹽無不及焉下視陳東
筦輩不啻衙官而斯役之
矣何者彼其識沉于闇智
而妬肆其詆謨也試取近

事一二論于忠肅之歿東
市乃尤其戴

郟王而置

英廟豈知

郟王立則社稷重而君父輕

元良繼則君父重而社稷尋

南宋之轍矣他若康齋之

聘昉自逆亨卽爰立作相

義無可受來以成君去以

潔已具見真儒作用議者

晦其心而瘡痛其影則何
取於編摩爲也故史有三
難無才則貧賈不殖無學
則巧匠乏材才且學而識
不具有折閱廢著偃繩墨
而改錯耳典彙推見至隱
盡芟其陋其於三長可謂
兼之蓋其整齊故事類子
長據行事仍人道不失素
王家法於以彪炳休明輝

映來許端有攸賴卽懸諸
日月與古人爭烈可也

兼北地米萬鍾仲詔父謨



國朝典彙序

古今典制未有備於

昭代者也當

開基之始力掃荒霾二界鴻濛

允稱再闢自後

聖烈神謨適加斟酌深仁濺澤
開淪浹肌膚密緯織綸網維群
象雖周孔復生不能輕議損
益也蓋典也者重也大也重
不可遷大不可褻故名之以

法猶有出有入臚之以史猶
有公有私惟一畫之以典而
山岳定日月懸矣典何所昉
曰昉於易典何所據曰據於
書六文陳而成撰此天地之

典也九疇列而成務此帝王
之典也萑稗錯雜萬寶告成
於穀垣野叅差五星垂象為
經晰是義者可以讀石樓先
生典彙矣先生之具軼材家

藏秘冊仕宦則蘭臺石室供
其採搜閒居則仙洞羽陵恣
其游覽上下二百年裁書二
百卷一切武功文德品制官
方區別有門色絡有數本質

有辨枝葉有依國體既綜物
章亦覈固儼然一代之史矣
而先生上遙尊之曰典下僅
宅之曰彙不編年不立傳若
自遜為中原之菀以待簪瑄

之采者此何意也元凱之所
謂五例子玄之所謂三長蓋
千古難之乃若孫盛直筆見
嫉權門王隱顯書取譏貴室
天黥人禍昌黎至揺手戒之

他如班生受金陳壽丐米魏
收納穢歸善爾朱沈約私親
祈刪宋畧楊銜之以碑誌不
實生盜跖而歿夷齊李翱以
行狀無憑屬門人而援故吏

允繇愛憎何闕定評此先生
所以虛筆削之權不居而引
考訂之林自處也雖然禮樂
征伐出自天子順德配命摠
因舊章惟輕變祖宗之法而

熙豐雒蜀之事遂層見疊出
成都之座致興續尾之謠東
園之錢不定愚神之論括索
已極誰為竭澤之漁人材寔
難忍作焚岡之酷使起先生


於今日執簡浩嘆伸紙含顰
併纂述之役亦不歆任矣余
生也晚不及事先生幸與先
生子原性遊原性曠材絕學
識通天人名山之藏出以公

世高文典冊遂供肄習夫談
遷彪固尚矣有何法盛則有
承天有裴松之則有子野有
姚察則有思廉有李德林則
有百藥彼其作述之盛禘襲

之休一家之無愆忘即可卜
一世之無僭竊於以羽翼金
匱之藏黼黻銅龍之業雖目
為

昭代信史其誰曰不宜

吳興後學韓文敬撰



國朝典彙目錄

朝端大政

卷一

開國

卷二

靖難

卷三

親征復辟

卷四

登極迎立

卷五

遺詔顧命

卷六

廟號尊謚

卷七

陵寢

卷八

東宮

卷九 后妃

卷十 宮闈

卷十一 駙馬公主

卷十二 戚畹

卷十三 宗藩 附藩祿 優錫親藩

卷十四 巡幸

卷十五 郊祀

卷十六 祈禱祠醮

卷十七 較閱

卷十八 耕蠶

卷十九 莊田 附勦戚田土

卷二十 御製

卷二十一 國史實錄

卷二十二 編輯諸書

卷二十三 獻書

卷二十四 論道議政

卷二十五 經筵日講

卷二十六 召對

卷二十七 隆遇

卷二十八 賜賚

卷二十九

求言納諫

卷三十

建言

卷三十一

勳臣考

卷三十二

輔臣考

卷三十三

中官考

附自宮

吏部

卷三十四

吏部

卷三十五

官制

附官俸

卷三十六

銓法

卷三十七

行取考選

卷三十八

京官考察

卷三十九

朝覲考察

卷四十

薦舉

卷四十一

舉劾

卷四十二

論劾

卷四十三

徵召

卷四十四

優老

卷四十五

存問

卷四十六

給驛

卷四十七

歸省告病

附丁憂起復

卷四十八

給由考滿

卷四十九

久任

附赴任違限

卷五十

冒濫官賞

卷五十一

請乞傳陞

卷五十二

宗人府

卷五十三

都察院

卷五十四

御史

卷五十五

總督巡撫

卷五十六

通政司

卷五十七

大理寺

卷五十八

詹事府

附春坊

司經局

卷五十九

太常寺

卷六十

四夷館

附譯書

卷六十一

太僕寺

卷六十二

兩京尹

卷六十三

光祿寺

卷六十四

國子監

卷六十五

翰林院

附庶吉士

卷六十六

鴻臚寺

卷六十七

尚寶司

卷六十八

六科

卷六十九

中書科

附誥勅

卷七十

行人司

附冊使

卷七十一

觀政進士

卷七十二

欽天監

卷七十三

太醫院

卷七十四

上林苑監

附內府禽獸

卷七十五

兵馬司

卷七十六

布政司

卷七十七

按察司

卷七十八

行太僕寺

卷七十九

苑馬寺

卷八十四

鹽運司

卷八十一

府州縣

卷八十二

王府官

卷八十三

恩廕

卷八十四

貢士

卷八十五

監生

卷八十六

雜流

戶部

卷八十七

戶部

卷八十八

方輿

卷八十九

戶口

卷九十四

賦役

卷九十一

田制

卷九十二

農桑

卷九十三

錢法

卷九十四

鈔法

卷九十五

茶法

卷九十六

鹽法

卷九十七

漕運

卷九十八

海運

卷九十九

救荒

附恤孤貧

卷一百

蠲免

卷一百一

倉儲

附庫貯

卷一百二

查理錢糧

禮部

卷一百三

禮部

卷一百四

禮制

卷一百五

聖節慶賀

附命婦朝賀

卷一百六

歲時宴享

卷一百七

朝貢

卷一百八

貢獻

卷一百九

朝儀

附奏事儀

卷一百十

章奏

卷一百十一

冠服制

附宮室輿馬器用

卷一百十二

樂制

卷一百十三

祥瑞

卷一百十四

災異

附殿災

日月食

卷一百十五

廟祀

卷一百十六

獻廟大禮

卷一百十七

山川社稷諸神壇廟

卷一百十八

歷代帝王祀典

卷一百十九

歷代名賢祀典

卷一百二十

功臣廟祀

卷一百二十一

文廟

卷一百二十二

從祀

卷一百二十三

聖哲裔

卷一百二十四

謚法

卷一百二十五

封贈

卹典

卷一百二十六 錄灰事

卷一百二十七 旌節孝

卷一百二十八 科目

卷一百二十九 學政

卷一百三十一 督學憲臣

卷一百三十一 文體

卷一百三十二 學術

卷一百三十三 風俗

卷一百三十四 釋教

卷一百三十五 道教

卷一百三十六 異術

兵部

卷一百三十七 兵部

卷一百三十八 都督府

卷一百三十九 錦衣衛 附鎮撫司

卷一百四十一 總兵叅遊

卷一百四十二 畱守都司

卷一百四十三 衛所

卷一百四十四 軍政

卷一百四十四 武臣襲替

卷一百四十五 推舉將才

卷一百四十六 封賞功勳

卷一百四十七 邊臣功罪

卷一百四十八 冒濫軍功 附冒濫軍功

卷一百四十九 武學武舉

卷一百五十 京營

卷一百五十一 調兵操練

卷一百五十二 戰具

卷一百五十三 軍伍

卷一百五十四 恤軍

卷一百五十五 兵餉

卷一百五十六 屯田

卷一百五十七 馬政

卷一百五十八 互市

卷一百五十九 備邊

卷一百六十 海防

卷一百六十一 江防

卷一百六十二 郵驛

卷一百六十三 兵變

卷一百六十四 妖術

卷一百六十五 寇盜

卷一百六十六 朝鮮

卷一百六十七 琉球

卷一百六十八 安南 [附東南諸夷]

卷一百六十九 日本

卷一百七十 北虜

卷一百七十一 河套

卷一百七十二 哈密

卷一百七十三 女直

卷一百七十四 三衛

卷一百七十五 西番 [附諸西戎]

卷一百七十六 土官 [附夷官]

卷一百七十七 川湖雲貴苗蠻

卷一百七十八 兩廣猺黎

刑部 [附刑部]

卷一百七十九 刑部 [附刑部]

卷一百八十 刑法

工卷一百八十一 律令

卷一百八十二 恩赦 [附登聞鼓]

卷一百八十三 按事

卷一百八十四 許奏

卷一百八十五 錄囚

工部 卷一百八十六 工部

卷一百八十七 都邑城池

卷一百八十八 皇城門禁

卷一百八十九 官署

卷一百九十一 水利

卷一百九十二 營建

卷九十三 工匠

卷一百九十四 採木

卷一百九十五 採辦內供物料

卷一百九十六 開礦

卷一百九十七 織造

卷一百九十八 燒造

卷一百九十九 抽分稅課

卷二百 市舶

附採珠寶

附柴炭鐵冶

卷一百六十八
 卷一百六十九
 卷一百七十
 卷一百七十一
 卷一百七十二
 卷一百七十三
 卷一百七十四
 卷一百七十五
 卷一百七十六
 卷一百七十七
 卷一百七十八
 卷一百七十九
 卷一百八十

凡例

一

國朝紀載不啻數百十家然或以識一時之見聞或以紀

一事之顛末傳記則步趨乎班馬編年則彷彿於史

綱要期傳信千秋用俾闡揚

一代若夫比倫彙次逐事條分披覽者原始以要終考鏡

一者尋端以究委有是書在餘不必觀

一先中丞衡文東土時漢陽尹中丞以憲章類編一書

屬先中丞補輯

世

國朝典彙

凡例

穆二廟先中丞遂與臨朐馮宗伯往復商確補所闕遺芟厥繁瑣宗伯因出所藏

兩朝實錄以備采錄遂成全書

一是書蒐集既廣編摩倍艱或一人而臧否異辭或一事而煩簡互出取裁固繇獨匠潤飾實采衆長故訂正之勞多資寮案備錄姓氏以志一時共事之訖然編纂雖成于當日殺青纔竣于今時故銜列今官而序仍昔爵至若邇者司道郡邑或經就正或叨助梓有禪斯集例得并書

國朝諸書多止弘正迨

世

穆兩朝闕焉未備夫時近則易徵事近則可守
肅皇帝制作聿新歷年最久

神謨偉烈炳耀史冊洵爲中興盛事是以特加詳備多諸書所未悉載若夫

神

光二廟時事更近尤昭人聽睹以
實錄未成猶成闕典後有作者尚有待焉
一先中丞性無它嗜獨有書淫自筮仕以逮懸車手未

嘗一日釋卷生平著述不下數十餘種是書纂輯最
勞經濟備見每觀手澤不覺潸然特傾貲以付剞劂
蓋不忍以先中丞數載苦心徒飽蠹魚云爾至若銀
根帝虎之訛政如落葉之不易盡掃尚期同志不吝
指裁

天啟甲子春仲之吉

不孝男與參謹識

先君嵩少公生平不涉世味不事生業爲大父中丞
公典彙一書剞劂行世手錄十有餘年事竣凡閱五
載心力交瘁囊產併空夫何壬申之冬祖龍肆虐藏

書五萬著述盈笥文棟棗梨槩付煨燼窮愁抑鬱生

與之俱一棺戢身外無長物獨典彙原板救存其半

不孝介壽時對殘編飲泣補刻無期幸吳雪厓明府

念

國典之攸存愍先君之賫志慨然捐助俸資兼以戚友義

會鳩工一載業成全書向緣蘇賈贖刻奉南北兩部

行文嚴禁周五溪四尊峻示毀板矣第舊本初行不

無煩蕪重複茲稍芟削俱係先君病中手裁復呈吳

明府鑒定非不孝介壽敢增減一字以取罪鑿也

時

崇禎甲戌之仲夏月不孝孫男介壽謹再識

...

...

...

...

...

...

...

...

國朝典彙卷之一

坤

都察院右僉都御史

臣

徐學聚編輯

禮部尚書兼翰林院學士

臣

馮琦訂正

浙江蘭谿縣知縣

臣

吳國琦重訂

朝端大政

開國

壬辰

元順帝至正十二年

春

高皇帝治兵濠州

帝之先自沛徙

江東世為句容朱家巷人宋季時大父熙祖復徙家

渡淮居泗州父仁祖諱世珍又徙居鍾離之東鄉

太后陳生四子帝其季也帝生元天曆戊辰之九

月丁丑是夕赤光滿室上燭于天里中人皆見之競呼
朱氏火起相率救護及至無有也歲甲申 仁祖及
太后俱崩又喪伯兄值旱饑疫窘甚鄉人劉繼祖與地
始獲窆時 帝年甫十七九月八皇覺寺逾月僧乏食
帝西遊合淝歷光固汝潁諸州凡三年時汝潁兵起列
郡騷動 帝復還皇覺寺至是定遠人郭子興與其黨
孫德崐等自稱元帥率賓客子弟攻濠州城搃之于是
亂兵焚皇覺寺寺僧逃散 帝亦出避兵方卜從雄未
決蒙古將徹里不花率兵欲復濠城憚不敢進惟日掠
良民爲盜以徼賞皆恟恟相扇動不自安 帝廼以閏

三月朔旦抵濠州城入門門疑以爲謀執欲害之以告
子興子興見 帝狀貌竒偉大異之因問所以來之故
遂留與謀事久之凡有攻伐卽命以往往輒勝子興由
是兵勢益盛

按自胡元入主中國人心痛憤傳至順帝在位日久宴
安失德災異迭見四方盜賊蜂起有司不能制時又聽
邪臣賈魯之言發河南北丁夫十七萬開濬黃河故道
民心益愁怨思亂先是童謠云石人一隻眼挑動黃河
天下反及開河果於黃陵岡得石人一眼而徐潁蘄黃
劉福通之兵起初樂城人韓山童自祖父以白蓮會燒

香惑衆至山童倡言天下大亂彌勒佛下生明王出世
河南江淮之人翕然信之福通與其黨杜遵道羅文素
等復詭言謂山童實宋徽宗八世孫當爲中國主殺白
馬黑牛贍告天地約同起兵以紅巾爲號事覺縣官捕
之急山童就擒其子韓林兒逃之武安惟福通黨盛不
可制遂反陷潁州又攻破羅山上蔡真陽等縣遂陷汝
寧府及光州息州衆至十萬李二號芝蔴李亦以燒香
聚衆與其黨趙均用彭早住攻陷徐州據之徐壽輝與
其黨倪文俊鄒普勝等俱以妖術聚衆起兵亦以紅巾
爲號攻陷蘄水縣及黃州路僭稱皇帝國號天元改元
治平未幾復陷漢陽興國武昌九江袁瑞饒信南康吉
安建昌安陸沔陽荆岳徽杭等郡自是南北郡縣多陷
沒群雄割據戰爭無虛日四方塗炭民不聊生咸願真
天子出矣

初宿州閔子鄉人馬公素剛直重然諾愛人喜施避仇定
遠與子興爲刎頸交馬公有季女甚愛之術謂女當大
貴馬公謀還宿州起兵應子興卽以女托子興曰幸公
善撫視子興撫之如已子已而馬公死子興欲爲女擇
良配以 帝度量豁達有智略方屬意于 帝其妻張
氏曰今天下亂君舉大事正當收集豪傑與成功業一

且彼爲他人所親誰與共成事者子興遂以其女妻之
卽高皇后也 帝旣在甥館遂日治兵掌征討之事
時彭早住趙均用爲元兵所敗自徐奔濠子興遂爲二
人所制 帝爲解釋由是恩威日著豪傑樂從若李善
長湯和徐達等數十人率先歸附姊子李文忠先同其
父母避亂與 帝相失其父禎聞 帝駐師滁陽遂携
來歸時年十二定遠人沐英年方十歲父母俱亡 帝
見而憐之與文忠皆賜姓朱氏命 后撫育如已子
十二月徐壽輝將明玉珍據成都玉珍隨州人初聞徐壽
輝兵起乃集鄉兵屯于青山結柵自固未幾降于壽輝
及倪文俊陷川蜀令玉珍守之至是文俊死玉珍遂自
據成都蜀中郡縣皆附之

癸巳五月秦州張士誠起兵據高郵自稱誠王蒙古知府
李齊死之士誠白駒場亭民及弟士德士信舉兵陷秦
州淮南行省遣齊招降被留久之賊酋自相戕始縱齊
歸士誠尋殺叅政趙璉走入湖復陷興化縣以行省左
丞僕哲篤偕宗王鎮高郵出齊守甓社湖五月乙未賊
數人呼噪入城省憲官皆遁齊急還城門已閉士誠遂
據高郵稱誠王國號大周建元天祐巳而有詔赦之使
至不得入賊給言請李知府來乃受命行省強齊往至

則下齊于獄齊雖辯說百端而士誠本無降意特遷延
爲繕守計官軍諜知之乃進攻城士誠呼齊使跪齊叱
曰吾膝如鉄豈爲賊屈士誠怒使曳倒槌碎其膝而副
之

甲午冬十月蒙古脫脫分兵寇六合滁州 帝帥耿再成
禦却之先是脫脫克高郵分兵圍六合六合遣使求救
于滁郭子興不答 帝曰六合受圍無救必斃六合既
斃次將及滁時元兵號百萬諸將畏之子興屬 帝往
令禱于神 帝曰事之可否當斷之于心何必禱也遂
帥師東之六合與耿再成守瓦梁壘元兵攻壘數四每

垂陷輒又完壘苦戰元兵疑之 帝又以計給之元兵
不敢迫遂引去既而元兵復大至將攻滁州 帝設伏
澗側令再成佯走誘之渡澗伏發城中鼓噪而出內外
夾擊元兵大敗獲其馬甚衆由是滁城得完時馮勝趙
得勝胡大海皆來從子興欲據滁稱王 帝察知其意
因說曰滁山城也舟楫不通商賈不集無形勝可居不
足據也子興默然

帝在和州與李國勝趙普勝同盟渡江既至采石國勝就
舟設宴邀 帝飲欲圖之部下人陰以其情告 帝推
疾不赴後數日設宴請國勝既至令壯士縛之投于水

部下廖永安俞通海以軍馬舡隻降

乙未三月郭子興卒 帝將其兵是時濠城舊帥孫德崖等亦乏糧率所部就食和州德崖因求入城假居數月

帝慮其彼衆我寡力不能扼不得已許之適有讒

帝于子興者子興怒卽自滁來欲督過之子興至館

帝往見之子興怒不言 帝曰家事緩急皆可理外事

當速謀孫德崖在此昔與公有宿憾此爲可憂子興默然德崖聞子興至心不自安欲他往 帝疑有變急報

子興備之德崖軍旣發 帝出城欲餞德崖行二十餘

里忽城中走報子興德崖兩軍相鬪 帝亟騎還德崖

軍在道者卽來追 帝一人直前忿曰城中殺害我軍

士汝寧不預謀 帝曰吾以送友故出城城中爭鬪何

由知之衆弗聽持 帝馬銜擁之行展轉十五餘里遇

德崖弟麾兵欲加害有語者曰孫公在和陽存亡未可

知萬一無事而先害朱公郭公必逞憾于孫公得無兩

傷乎乃往觀之見子興繫德崖項與之對飲卽還告曰

若從衆所爲幾害兩人衆怒猶未釋明日復拘入麻湖

中又明日子興聞 帝被執如失左右手亟遣徐達等

往代達至謂衆曰不如釋朱公令之還以出孫公于是

帝得還旣至和陽子興亦釋德崖去徐達等亦還初

子興既執德崖欲殺之以報舊憾及聞帝被執乃釋德崖然心常怏怏憂悶致疾久不起遂卒德崖欲襲其軍子興之子聞之懼不能當乃請帝代統之而常遇春鄧愈等皆來從時汝穎劉福通等迎韓林兒爲帝居亳遣人詣和陽招諸將張天祐遂往時帝發兵及親率將士取和陽西南民寨次第平之天祐尋自亳歸齎劉福通檄推子興之子爲都元帥天祐及帝皆副元帥帝曰大丈夫寧能受制于人耶遂不受

六月丙辰帝自和陽渡江取太平路諸將謀渡江患無舟楫時俞通海通源廖永忠永安等各擁衆據巢湖張德勝亦集義衆結水寨自保五月丁亥間道來附帝謂徐達等曰方謀渡江而巢湖水軍至吾事濟矣時銅城閘馬場河等隘口皆爲蒙古中丞蠻子海牙水寨所扼惟一小港可達然淺涸不可通大艦已而大雨兼旬川谷流溢巢湖舟魚貫而出悉至和陽命廖永安張德勝俞通海等將之壬寅帝帥舟師攻蠻子海牙于峪路口大敗其衆遂與諸將定渡江之計諸將咸欲直趨金陵帝曰取金陵必自采石始采石南北襟喉得采石金陵可圖也六月乙卯帝率徐達湯和李善長常遇春廖永安馮國用邵榮鄧愈耿君用毛廣各引舟渡

江時西北風順舳艫齊發軍士皆謹躍永安請所向
帝曰采石大鎮其備必固牛渚磯前臨大江彼難爲禦
今往攻之其勢必克乃引帆向牛渚風力稍勁頃刻及
崖守者驚駭出拒不支卽走常遇春奮戈先登諸軍鼓
勇繼之采石鎮兵驚潰遂拔之緣江諸壘望風迎附乃
令軍中皆食食已卽率衆自觀渡向太平橋直趨太平
城下元平章完者不花萬戶萬鈞達魯花赤普里罕忽
里閉城拒守 帝命將急攻遂拔之完者不花等棄城
走耆儒李習陶安等率父老出城迎安見 帝狀貌謂
習等曰龍姿鳳質非常人也我輩今有主矣 帝之發

采石也先令李善長爲戒戢軍士榜比入城卽張之士
卒欲剽掠見榜揭通衢皆愕然不敢動有一卒違令卽
斬以徇城中肅然 帝召陶安李習與語時事安因獻
言曰方今四海鼎沸豪傑並爭攻城屠邑互相雄長然
其志皆在子女玉帛取快一時非有撥亂救民安天下
之心明公率衆渡江神武不殺人心悅服以此順天應
人而行吊伐天下不足平也 帝曰足下之言甚善吾
欲取金陵足下以爲何如安曰金陵古帝王之都龍蟠
虎踞限以長江之險若取而有之據其形勝出兵以臨
四方則何向不克其言合 帝意由是禮遇安甚厚事

國朝典彙卷一
多與議焉乃改太平路爲太平府以李習知府事寘太平與國翼元帥府諸將奉 帝爲大元帥 帝命李善長爲帥府都事潘廷堅爲帥府教授汪廣洋爲帥府令史以陶安參幕府事命諸將分守各門修城浚河以固守禦

丙申三月 帝克金陵改集慶路爲應天府陳埜先之子兆先合淮兵二十萬屯營方山與海牙茂才等相望 帝命廖永安馮國用先攻兆先營大破之進拔其柵擒置麾下五百人者多疑懼不自安 帝覺其意至暮令其悉入衛屏舊人于外獨留馮國用侍臥榻旁 帝解甲酣寢達旦疑懼者始安乃相語曰旣活我又以腹心待我何可不盡力圖報庚寅進兵集慶未及城五里諸軍鼓噪而進元兵皆破膽行臺御史大夫福壽督兵戰我師擊敗之福壽閉門拒守大軍薄城下將士以雲梯登城城中莫能守遂克之福壽又督兵巷戰兵潰坐伏龜樓前指揮左右更欲拒戰或勸之遁福壽叱而射之督戰不已遂死於兵平章阿魯灰參政伯家奴及集慶路達魯花赤達尼達思等皆戰死獲其御史王稷元帥李寧等三百餘人蠻子海牙走投張士誠水寨元帥康


茂才苗軍元帥尋朝佐許成劉哈刺不花海軍元帥葉
撒及阿魯灰部將完都等各率衆降凡得軍民五十餘
萬帝入城悉召官吏父老人民諭之曰元失其政所
在紛擾兵戈並起生民塗炭汝等處危時朝夕惴惴不
能自保吾率衆至此爲民除亂耳汝宜各安職業毋懷
疑懼賢人君子有能相從立功業者禮用之居官慎毋
暴橫以殃吾民舊政有不便者吾爲汝除之於是城中
軍民皆喜悅更相慶慰辛卯帝周覽城郭謂徐達等
曰金陵險固古所謂長江天堦真形勝地也倉廩實人
民足吾今有之諸公又能同心共力以相左右何功不

成達曰成功立業非偶然今得此殆天授也乃改集慶
路爲應天府置天興建康翼統軍大元帥府以廖永安
爲統軍元帥命趙忠爲興國翼元帥以守太平得儒士
夏煜孫炎楊憲等十餘人皆錄用之置上元江寧二縣
金陵既定帝欲發兵取鎮江慮諸將不能禁戢士卒爲
民患明日召諸將數以嘗縱士卒之過欲置之法李善
長懇救乃免於是命徐達等將兵以往戒之曰吾自起
兵未嘗妄殺今汝等當體吾心戒戢將士城下之日毋
焚掠毋殺戮有犯令者處以軍法縱之者罰無赦達等
頓首受命丙申徐達湯和張德麟廖永安等進兵攻鎮

江丁酉克之苗軍元帥完者圖出走達等自仁和門入
 號令嚴肅城中宴然民不知有兵已亥以鎮江為淮興
 鎮江翼元帥府命徐達湯和為統軍元帥改鎮江路為
 江淮府元康茂才自集慶奔江口俞通海以舟師追及
 之茂才遂帥所部三千解甲來降頓首言前日之戰各
 為其主今日屢敗乃天數也事至於此死生惟命苟得
 生全尚竭犬馬之力 帝釋之俾率所部三千餘人以
 從征

諸將奉 帝為吳國公以元御史臺為公府置江南行中
 書省 帝摠吳國事

七月初常州奔牛壩人陳保二聚眾以黃帕裹首號黃包
 軍湯和等兵下鎮江狗奔牛呂城保二以眾降至是復
 叛降于張士誠誘執詹李二將以去乙亥 帝遣儒士
 楊憲通好于張士誠書略曰近聞足下兵由通州遂有
 吳郡昔隗囂據天水以稱雄今足下據姑蘓以自王吾
 深為足下喜吾與足下東西境也睦鄰守圉保境息民
 古人所貴吾甚慕焉自今以後通使往來毋惑于交構
 之言以生邊釁士誠得書不悅拘畱憲不還尋誘我斥
 候以舟師攻鎮江統軍元帥徐達等禦之敗其軍于龍
 潭 帝聞之使諭徐達曰張士誠起于負販譎詐多端



今來寇鎮是其交已變當速出軍攻毘陵先機進取沮其詐謀於是達帥師攻常州進薄其壘且遣使來告賊已窘迫請益師以薄之 帝復遣兵三萬往助之於是達軍於城西北湯和軍城北張彪軍於城東南士誠遣其弟張九六以數萬衆來援達曰張九六狡而善鬪使其勝勢不可當吾當以計取之乃去城十八里設伏以待仍命總管趙均用率鉄騎爲奇兵達親督師與九六戰鋒旣交均用鉄騎橫衝其陣陣亂九六退走遇伏馬蹶爲先鋒刁國寶王虎子所獲并擒其將張湯二將軍九六卽士德梟鷲有謀士誠陷諸郡九六力爲多旣被擒士誠氣沮 帝欲留九六以誘致士誠九六間遺書士誠俾降元以謀我乃誅之

十一月張士誠兵旣敗于常州又以其弟九六被擒士誠懼遣其下孫君壽奉書來請和願歲輸糧二十萬石黃金五百兩白金三百斤以爲犒軍之資各守封疆不勝感恩 帝復書曰睦鄰通好有邦之常開釁召兵實由于爾向者用師京口靖安疆場師至奔牛呂城陳保二望風降附爾乃受其叛逆給執我詹李二將繼遣儒士楊憲齋書通好又復拘留構兵開釁誰執其咎我是以遣將帥兵攻圍常州生擒張湯二將尚以禮待未忍加

誅爾既知過能不墮前好歸我使臣將校仍餽糧五十萬石即當班師况爾所獲詹李乃吾偏裨小校無益成敗張湯二將爾左右手也爾宜三思大丈夫舉事當赤心相示浮言誇辭吾甚厭之士誠得書不報徐達兵圍常州久不下帝復益達精兵二萬人圍之士誠守將誘我長興新附義兵元帥鄭僉院以兵七千叛去初我師四面圍常州及鄭僉院叛我師四面去其三達營于城南常遇春營于城東南三十里外士誠兵挾鄭僉院攻徐達湯和壘達勒兵與戰常遇春廖永安胡大海自其壘來援內外夾擊大破之生擒其將張德餘軍奔入城士誠復遣其將呂軫馳入常州督兵拒守達復進師圍之城中益困

十二月戊申復以江淮府為鎮江府

是時帝所克城池令諸將守之不許儒者在左右議論古今止設一吏掌文書有失罪獨坐吏將官正妻留京城聽於外娶妾

丁酉二月丙午遣耿炳文劉成自廣德取長興張士誠將趙打虎以兵三千迎戰敗走湖州戊申耿炳文克長興獲戰船三百餘艘擒士誠守將李福安答失蠻等議兵萬戶蔣毅率所部二百人降有儒士溫祥卿者避亂挈

家來歸炳文與語竒之遂留贊軍事用其策分兵據要害設戰具爲守禦計乙亥改長興州爲長安州立永興翼元帥府以耿炳文爲總兵都元帥劉成爲左副元帥李景元爲右元帥守之

三月戊午我師克常州初常州兵雖少而食足故堅拒不下及誘我叛兵入城軍衆糧少不能自存我師攻之益急呂珍宵遁徐達等遂取之丁亥置毘陵翼以湯和爲樞密院同僉總管張嚇爲元帥守之命鎮撫孫繼達浚治城隍改常州路爲長春府以高復權知府事尋復改長春府爲常州府

夏四月徐達常遇春率兵取寧國元守臣別不華楊仲英等閉門拒守攻之乂不下遇春中矢裹創與戰帝親往督師命造飛車前編竹爲重蔽數道並進仲英不能支開門請降其百戶張文貴殺妻子自刎死擒其元帥朱亮祖并得軍士十餘萬馬二千餘匹于是屬縣太平旌德南陵涇縣相繼皆下

六月己未命趙繼祖郭天祿吳良取江陰張士誠兵據秦望山以扼我師繼祖引兵攻之會大風雨其兵奔潰我師據其山翌日進攻州之西門克其城命良守之先是士誠北有淮海南有淞西長興江陰二邑皆其要害長

興據太湖口陸走廣德諸郡江陰枕大江扼姑蘓通州
濟渡之處得長興則士誠步騎不敢出廣德窺宣歙得
江陰則士誠舟師不敢泝大江上金焦至是並為我有
士誠侵軼路絕

七月徐達擊敗張士誠兵獲馬五十匹船三艘降其兵甚
衆明年六月士誠兵寇常熟廖永安大破之

八月張士誠寇嘉興屢為楊完者所敗乃以書請降詞多
不遜完者欲納之達識帖睦爾以其反覆不可信完者
固勸乃承制假江淞廉訪使周伯琦行省叅知政事至
平江路諭之士誠始要王爵達識帖睦爾不許又請爵

為三公達識帖睦爾曰三公非有司所定今我雖便宐
行事然不敢專也完者又力為之請達識帖睦爾外雖
拒之實幸其降又恐忤完者意遂授士誠太尉其弟士
德淮南平章士信同知行樞密院事其黨皆授官有差
於是元朝以招安士誠為達識帖睦爾之功加太尉
費子賢率兵至武康三里橋擊敗其萬戶斬首百餘取之
九月徐壽輝將陳友諒襲殺倪文俊并其軍友諒沔陽漁
人子嘗為縣吏不樂會壽輝文俊兵起慨然往從之遂
為文俊簿書椽尋亦領兵為元帥及文俊專恣心不能
平至是文俊謀殺壽輝不果奔黃州友諒因乘釁襲殺

之遂并其軍自稱平章
十一月 帝閱軍於大通江遂命元帥繆大亨率師取揚州克之青軍元帥張明鑑以其衆降初乙未歲明鑑聚淮西以青布爲號名青軍人號一片瓦其黨張鑑驍勇善用鎗又號長鎗軍聚黨暴悍專事剽掠由含山全椒轉掠六合天長至揚州人皆苦之時元鎮南王李羅普化鎮揚州招降明鑑等以爲濠泗義兵元帥俾駐揚州分屯守禦明鑑等以食盡復謀作亂說鎮南王曰朝廷遠隔事勢未可知今城中乏糧衆無所托命殿下世祖孫當正大位爲我輩主出兵南攻以通糧道救饑窘不然人心必變禍將不測鎮南王仰天哭曰汝等何不知大義若如汝言我何面目見世祖於宗廟耶麾其衆使退明鑑等不從呼噪而起因逐鎮南王出走至淮安爲趙均用所殺明鑑等卽據城克暴益甚日屠城中居民以爲食至是大亨攻之明鑑等不支廼出降得其衆數萬戰馬二十餘匹報至 帝命悉送其將校妻子至建康賑給之置淮海翼元帥府命元帥張德林耿再成等守之改揚州路爲淮海府以李德成知府事按籍城中居民僅餘十八家德林以舊城虛曠難守截城西南隅築而守之

國朝典彙卷一
見
戊戌正月陳友諒破安慶蒙古淮南行省右丞余闕歿之
鄧愈遣部將王弼孫虎及汪同等取婺源州兵至城西
與元守將鐵木兒不花戰自旦至昃不下乃分門逼之
孫茂先攻北門王弼孫虎攻南門汪同攻東門三道並
進遂拔其城斬鐵木兒不花獲士三千餘人復遣萬戶
朱國寶攻高沙壘克之

三月鄧愈朱文忠胡大海率兵進攻建德道出遂安長鎗
元帥余子貞以兵來拒愈等擊敗之追至淳安有遂安
將洪公率兵來援大海復戰敗之兵抵建德元帥不花
等棄城遁父老何良輔等率衆降 帝留文忠鎮守

四月陳友諒遣將趙普勝寇池州陷之樞密分院判趙忠
被執

九月元江浙同僉員成等以兵三千人來降朱文忠遣元
子實以步騎千人統其衆於新城送員成於建康

十月胡大海至婺之鄉頭擒萬戶趙伯顏不花雲完都等
平其五壘是日進攻蘭谿敵兵千餘出戰敗之克其城
獲元廉訪使趙秉仁等十四人馬牛羊萬頭立閩越翼
元帥府分兵守要害遂進攻婺州

徐達邵榮攻宜興久不下 帝遣使謂達等曰宜興城小
而堅猝未易拔聞其城西通太湖口張士誠餉道所由

出若以兵斷其餉道彼軍食內乏破之必矣達等乃分兵絕太湖口而并力急攻城遂拔之

元帥胡大海等進兵徽州元守將八思爾不花及萬戶吳訥等拒戰大海擊敗之遂拔其城訥等退走欲守遂安縣大海引兵追及白際嶺復擊敗之訥自殺乙酉改徽州路爲興安府立雄峰翼元帥命鄧愈守之

樞密院判胡大海帥兵攻婺州不克 帝自將親軍副都指揮使楊璟等師十萬往征之十二月壬辰自宣歷徽道蘭谿至婺命掾史周德遠入城招諭不下廼督兵圍之先是元叅知政事石秣宜孫守處州聞大軍克徽州

進攻婺城與叅謀胡深章濫議爲守備造獅子戰車數百輛以弟石秣厚孫守婺繼令深等將車師爲援自率衆萬餘出縉雲以應之深至松溪觀望不敢進 帝謂諸將曰婺倚石秣宜孫故未肯卽下聞彼以車戰兵來援此豈知變者松溪山多路狹車不可行今以精兵遏之其勢必破援兵旣破則城中絕望可不勞而下之翌日命僉院胡大海養子濟誘其兵于梅花門外縱擊大敗之擒其前鋒元帥李彌章并獲其所製驚馬器仗深等遁去深之來也晨起見西北有黑氣東南有白氣其長亘天頃之白氣爲黑氣所蕩深知其不吉恐衆心驚

懼謬曰今日有殺氣戰必勝已而戰敗城中勢益孤臺
憲將臣畫界分守意復不相能於是樞密院同僉寧安
慶都事李相開門納大兵浙東廉訪使楊惠婺州達魯
花赤僧住皆戰死執其南臺侍御史帖木烈思院判石
秣厚孫廉訪僉事安慶以下官 帝入婺州下令禁戢
軍士剽掠有親隨知印黃某取民財卽斬以徇民皆按
堵城未破先一日有五色雲見城西氤氳似蓋城中望
之以爲祥及城下廼知爲 帝駐兵之地置中書分省
于婺州徵王禕爲省掾商略機務立金華翌元帥府以
袁貴爲元帥吳德真副之改婺州路爲寧越府以儒士
王宗顯爲知府帳前總管陳從貴兼知東陽縣事總兵
三百戍之義兵元帥呂兼明兼永康知縣帳前總管王
道同爲義烏知縣楊苟爲武義知縣命寧安慶仍同僉
樞密院事隨軍征進遂命寧越知府王宗顯開郡學延
儒士葉儀宋濂爲五經師戴良爲學正吳沉徐原等爲
訓導時喪亂之餘學校久廢至是始聞弦誦之聲無不
欣悅 帝旣撫定寧越欲遂取浙東未下都郡集諸將
諭之曰克城雖以武而安民必以仁吾師比入建康秋
毫無犯故一舉而遂定今新克婺城民始獲甦政當撫
恤使民樂于歸附則彼未下郡縣亦必聞風而歸吾每

聞諸將下一城得一郡不妄殺人輒喜不自勝蓋師旅之行勢如烈火火烈則人必避之爲將者能以不殺爲心非惟國家所利在已亦蒙其福爾等從吾言則事不難就而大功可成矣

己亥正月僉院胡大海帥兵取諸暨張士誠守將華元帥戰敗宵遁萬戶沈勝以衆降我師入城其衆洶洶不定復作亂大海復擊敗之生擒四千餘人馬六十匹遂改諸暨爲諸全州

三月方國珍以慶元溫台三郡來歸先是帝遣主簿蔡元剛儒士陳顯道往慶元招諭方國珍國珍與其下謀曰方今元運將終豪傑並起惟江左號令嚴明所向莫敵今又東下婺州恐不能與抗况與我爲敵者西有張士誠南有陳友諒莫若姑示順從藉爲聲援以觀其變遂遣使奉書幣以溫台慶元三郡來獻且以其次子關爲質帝曰古者慮人不從則爲盟誓盟誓變而爲交質皆繇未能相信故也今旣誠信來歸便當推誠相與如青天白日何自懷疑而以質子爲哉乃厚賜關而遣之又獻金玉飾馬轡却之

秋七月乙巳常遇春率兵攻衢州建奉天旗樹柵圍其六門造呂公車仙人橋長木梯懶龍爪擁至城下高與城

齊欲階以登城又于大西門城下穴地道攻之元守臣宋伯顏不花等悉力備禦以束葦灌油燒呂公車駕千秤釣懶龍瓜用長斧以砍木梯築夾城防穴道遇春攻之弗克乃以奇兵出其不意突入南門甕城毀其所架砲督將士攻圍益急九月丁未克之時遇春圍城兩月餘攻擊無虛日元樞密院判張斌度不能守密遣其下詣遇春約降是夕引軍士十餘人出小西門迎大軍入城宋伯顏不花不知其降也猶督兵拒戰俄頃城中舉火大軍已入城衆潰總管馮浩赴水死擒宋伯顏不花及院判朶粘等得糧八千石改衢州爲龍游府以武義知縣楊苟知府事立金斗翼元帥府以唐君用爲元帥夏義爲副元帥朱亮祖爲樞密分院判官命寧越分省都事王愷兼理軍儲遇春還寧越

九月初陳友諒攻陷安慶令趙普勝守之六月我僉院俞通海率兵攻趙普勝不克而還諸將患之 帝曰普勝雖勇而寡謀友諒挾主以令衆上下之間心懷疑貳用計以離之一夫之力耳時普勝有門客通數衝嘗爲普勝畫策普勝尊爲謀主乃使人陽與客交而陰間之又置書與客故誤達普勝果疑客客懼不能安遂來歸於是厚待客客過望傾吐其實盡得普勝平日所爲乃重

以金幣資客潛往友諒所親以問普勝普勝不之覺見友諒使者輒自言其功悻悻有德色友諒由是忌之又
有言普勝將歸于我者及是憤潛山之敗友諒益欲殺
普勝乃詐以會軍為期自至安慶圖之普勝不虞友諒
之圖已聞其至具燒羊迎與鴈汊登舟見友諒友諒就
執殺之併其軍

冬十一月取處州時胡深與石秣宜孫統龍泉慶元松陽
遂昌兵欲閉關為守拒計士民咸請于深願內附以全

民命深知時事已去乃解甲出見軍師胡大和和遂
不受兵 帝素聞深名召至南京擢左司員外郎深有

